



KOMUNIKADO

Willemstad – Limpiesa di e zeta ku a laba bin na diferente kaminda na nos kostanan ta kana bon, pero den wikènt ku ta bini tin mester di 60 te ku 100 boluntario pa por hasi limpiesa adishonal. Asina Sea Turtle Conservation Curaçao (STCC) ta bisa. Boluntarionan por mèldu pa medio di página di facebook di e organisashon.

STCC i Uniek Curaçao, ta kordiná e fluho di boluntario ku for di final di siman pasá ta traha sin kansa. Ounke na Kòrsou e influensia di e zeta riba nos kostanan te ainda ta kontrolabel, STCC ke probechá pa limpia henter un bahia na Wakawa, kaminda tin masha hopi otro tipo di sushi i tambe algun petrolio. Tin planiá pa bai hasi e limpiesa aki den wikènt nos dilanti.

Di e organisashon Uniek Curaçao tin awe mas òf ménos 15 boluntario riba pia, ku ta traha na Ascencion. Segun e organisashon e área ta kasi limpi. Awe 6 boluntario di STCC ta limpia atrobe na Shete Boka. Un Boka ta keda kla awe, despues ta sigui traha na Kortelein i Dos Boka.

E tim interministerial, bou di Havenmeester Marlon La Roche, ta sòru ku e boluntarionan tin entre otro hèmber i otro material pa kolektá e zeta aden. Ministerio di GMN a sòru pa transportashon di e material ku e boluntarionan a haña i a kolektá tur esaki na LVV pa despues hib’e Isla kaminda lo deshasí di dje.

Diferente organisashon gubernamental i komersial ta duna yudansa den forma di material ku ta nesesario pa por hasi e limpiesa na un manera sano i efektivu. E organisashon di kònsultent RAC/REMPEITC-Caribe ta duna e tim interministerial yudansa nesesario for di nan eksperensia i konosementu balioso di desasternan ku zeta den pasado.

Miéntas e tim interministerial i e diferente gruponan di limpiesa ta sigui traha sin kansa, tur boka, bahia i playa ta keda normal aksesibel pa turista i bishitante. No tin niun peliger ni molèster dor di e zeta, ounke ainda outoridatnan ta avisá pa no mishi ku e restunan di zeta ku a lèk mas òf ménos un luna pasa na Trinidad. E zeta su konsistensia ainda ta bou di investigashon.